

Ո Ր Ո Շ ՈՒ Մ

2-03-18
17-2-1302

Վարչական իրավախախտման գործով գանգատն առանց բավարարման, իսկ որոշումն անփոփոխ թողնելու մասին

01.03.2018թ.

ք.Երևան

Ճանապարհային ոստիկանության պետ, ոստիկանության գնդապետ Եգոր Կարապետյան, վերանայելով Լուսինե Վարդանյանի դիմումի շուրջ ստեղծված նյութերը,



Պ Ա Ր Զ Ե Ց Ի

2018թ. փետրվարի 2-ին Երևան քաղաքի Ազատության պողոտա 11-78 հասցեի բնակիչ Լուսինե Վարդանյանը դիմումով հայտնել է, որ ճանապարհային ոստիկանության տեսուչ Վ.Ռուբենյանի կողմից կայացվել է ԱԴ թիվ 422319 որոշումը՝ 5000 դրամ տուգանք նշանակելու վերաբերյալ՝ չամրակապված վիճակում ուղևոր փոխադրելու համար, ինչն անօրինական է և չի բխում գործող օրենսդրական պահանջներից, քանի որ դա կայացվել է առանց որևէ ապացույց ներկայացնելու: Քաղ.Լուսինե Վարդանյանը նշել է, որ տեսուչը սկզբից ներկայացրել է իր կողմից՝ չամրակապված վիճակում ավտոմոբիլը վարելու վերաբերյալ իրավախախտում, այնուհետև, նկատելով, որ ամրակապված է, հայտնել է, որ ուղևորն ամրակապված չի եղել երթևեկության ընթացքում և նոր է ամրակապվել:

Վկայակոչելով մի շարք օրենքներ՝ դիմումատուին խնդրել է անվավեր ճանաչել իր նկատմամբ կայացված որոշումը:

Դիմումի ուսումնասիրությամբ պարզվել է, որ 13.01.2018թ. ժամը 17.10-ին Երևան քաղաքի Րաֆֆու փողոցում քաղ.Լուսինե Վարդանյանի կողմից վարած «Յոնդա» մակնիշի 05 GL 015 հաշվառման համարանիշի ավտոմոբիլը կանգնեցվել է ճանապարհային ոստիկանության ճՊԾ 1-ին սպայական գումարտակի 3-րդ սպայական դասակի տեսուչ, ոստիկանության ավագ լեյտենանտ Վ.Ռուբենյանի և նույն դասակի նախկին տեսուչ, ոստիկանության ավագ լեյտենանտ Ն.Քոչարյանի կողմից՝ ՃԵԱԱՄՕ-ի խախտման համար, այն է՝ վարորդը փոխադրել է անվտանգության գոտիով չամրակապված ուղևոր: Վարորդի նկատմամբ կազմվել է վարչական իրավախախտման վերաբերյալ արձանագրություն և համաձայն ՀՀ ՎԻՎ օրենսգրքի 123.3 հոդվածի, կայացվել է ԱԴ թիվ 422319 որոշումը՝ 5000 դրամ տուգանելու մասին:

Ըստ ծառայողների գրավոր բացատրությունների՝ Երևան քաղաքի Րաֆֆու փողոցում նկատել են, որ «Յոնդա» մակնիշի 05 GL 015 հաշվառման համարանիշի ավտոմոբիլի վարորդը փոխադրում է անվտանգության գոտիով չամրակապված ուղևոր: Սահմանված կարգով կանգնեցնելուց հետո, տեսուչ Ռուբենյանը մոտեցել է վարորդին, ներկայացել, հայտնել կանգնեցման պատճառը և պահանջել է փաստաթղթերը: Վարորդի այն հարցին, թե արդյոք ուղևորի ամրակապվելը պարտադիր է, վերջինիս պարզաբանվել է, որ երևելության ընթացքում ավտոմոբիլում գտնվող բոլոր ուղևորները պետք է ամրակապված լինեն անվտանգության գոտիով: Հաշվի առնելով, որ խախտումն եղել է ակնհայտ, պարզ տեսանելի և անմիջապես տեսուչների տեսադաշտում՝ Լուսինե Վարդանյանի նկատմամբ կազմվել է վարչական իրավախախտման վերաբերյալ արձանագրություն, որից հետո առաջարկվել է

ծանոթանալ դրա բովանդակությանը, սակայն վերջինս հրաժարվել է և ստանալով միայն փաստաթղթերը՝ հեռացել է:

Ծառայողները հայտնել են նաև, որ նշված ավտոմոբիլը ի սկզբանե կանգնեցվել է անվտանգության գոտիով չամրակապված ուղևոր փոխադրելու համար:

Դիմումում նշված հանգամանքների շուրջ պարզաբանումներ տալու նպատակով՝ քաղ.Լուսինե Վարդանյանը հեռախոսակապի միջոցով հրավիրվել է ճՈ, սակայն հայտնել է, որ դիմումին ավելացնելու ոչինչ չունի և խնդրել է քննարկման արդյունքների մասին տալ գրավոր պատասխան:

Համաձայն «Ճանապարհային երթևեկության անվտանգության ապահովման մասին» ՀՀ օրենքի 17-րդ հոդվածի՝ ճանապարհային ոստիկանության ծառայողը պարտավոր է տրանսպորտային միջոցը կանգնեցնել, եթե ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները: Նույն հոդվածի 8-րդ մասի համաձայն՝ երթևեկության սահմանված արագության գերազանցման և տրանսպորտային միջոցների ապակիների լուսաթափանցելիության սահմանված չափի խախտումների համար պատասխանատվություն է առաջացնում, երբ տվյալ խախտումը փաստարկված է համապատասխան տեխնիկական միջոցների կիրառմամբ:

Համաձայն Վարչական իրավախախտումների վերաբերյալ ՀՀ օրենսգրքի 123.3 հոդվածի, *տրանսպորտային միջոցների անվտանգության գոտիները չամրակապած կամ սաղավարտը չկոճկած վիճակում կամ առանց սաղավարտի տրանսպորտային միջոցներ վարելը, ինչպես նաև անվտանգության գոտիները չամրակապած կամ սաղավարտը չկոճկած կամ առանց սաղավարտի ուղևոր փոխադրելը՝ առաջացնում են տուգանքի նշանակում՝ նվազագույն աշխատավարձի հնգապատիկի չափով:*

Այսպիսով, քաղ.Լուսինե Վարդանյանի արարքում առկա է Վարչական իրավախախտումների վերաբերյալ ՀՀ օրենսգրքի 123.3 հոդվածով նախատեսված իրավախախտման զանցակազմը, ուստի, ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Լուսինե Վարդանյանի դիմումը թողնել առանց բավարարման, իսկ ճանապարհային ոստիկանության ՃՈԾ 1-ին սպայական գումարտակի 3-րդ սպայական դասակի տեսուչ, ոստիկանության ավագ լեյտենանտ Վ.Ռուբենյանի կազմած վարչական իրավախախտման արձանագրության հիման վրա 13.01.2018թ. կայացված ԱԴ թիվ 422319 որոշումը՝ Լուսինե Վարդանյանին հիմզ հազար դրամ տուգանելու մասին՝ անփոփոխ:
2. Սույն որոշման օրինակներն ուղարկել ճանապարհային ոստիկանության ՎԳ բաժանմունք և դիմումատուին:
3. Սույն որոշումը կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում:



Ե. Կարապետյան